

讚

衣奉獻 綾羅錦繡紗 銷金掛子難描畫
龍女織就金絲帕 波斯匿王捨袈裟
馬鳴王菩薩 誓願神通化
南無普供養菩薩摩訶薩 (三唱)

恭聞

十號能仁，坐寶蓮華成正覺；十身調御，一微塵內轉法輪。光明徧照於十方，方便全超於十地。具足十波羅蜜，故稱十願大王。仰冀洪慈，俯垂洞鑑！上來奉為，求懺我等，修建慈悲道場懺法。茲當第十卷，入壇緣起。端恪一心，精陳十供。奉獻十方三寶，熏修十軸儀文；依十科之懺法，解十纏之罪愆。切念我等，因從曩劫，果感今生。昧十善之正因，造十惡之業障。十纏自遠，似鈎鎖之連環；十習自熏，類飛蛾之赴火。漸及百千形狀，復成無量罪端。愛見未忘，貪心難滿；瞋火燒盡菩提之種，業風凋殘功德之林。歲月蹉跎，方知過咎；光陰倏忽，始覺前非。今則承懺悔之玄門，幸熏修而有緒；憑諸緇侶，披閱金文。修佛事以周隆，作無窮之法利。克念攝念以重重，意誠投誠於一一。望佛垂慈，冥熏加被。

一念普觀無量劫 無去無來亦無住
如是了知三世事 超諸方便成十力

第十卷入懺

啓運慈悲道場懺法一心歸命三世諸佛

南無過去毘婆尸佛 南無尸棄佛

南無毘舍浮佛 南無拘留孫佛

南無拘那含牟尼佛 南無迦葉佛

南無本師釋迦牟尼佛 南無當來彌勒尊佛

南無懺摩會上佛菩薩 (三稱)

慈悲道場懺法卷第十

菩薩回向法第三十八

今日道場，同業大眾！相與已得，捍勞忍苦，修如是等，無量善根。宜復人人，起如是念：我所修習善根，悉以饒益一切衆生；令諸衆生，究竟清淨。以此所修，懺悔善根；令諸衆生，皆悉滅除地獄、餓鬼、畜生、閻羅王等，無量苦惱。以此懺法，為諸衆生，作大舍宅，令滅苦陰；作大救護，令脫煩惱；作大歸依，令離恐怖；作大止趣，令至智地；作大安隱，令得究竟安隱處；作大明照，令滅癡闇；作大燈明，令得安住，究竟明淨；作大導師，令入方便法門，得淨智身。

今日道場，同業大眾！如此諸法，是菩薩摩訶薩，為怨親故，以諸善根，同共回向；於諸衆生，等無差別；入平等觀，無怨親想。常以愛眼，視諸衆生。若衆生懷怨，於菩薩起惡

逆心者；菩薩為真善知識，善調伏心，為說深法。譬如大海，一切衆毒，所不能壞；菩薩亦爾。愚癡無智，不知報恩，如是衆生，起無量惡；不能動亂，菩薩道心。譬如杲日，普照衆生，不為無目，而隱光明；菩薩道心，亦復如是。不為惡者，而生退沒；不以衆生，難調伏故，退捨善根。菩薩摩訶薩，於諸善根，信心清淨，長養大悲；以諸善根，普為衆生，深心回向。非但口言，於諸衆生，皆發歡喜心、明淨心、柔軟心、慈悲心、愛念心、攝取心、饒益心、安樂心、最勝心，以諸善根回向。菩薩摩訶薩，發如是善根回向；我等今日，亦應仰學如是回向，心念口言：若我所有回向功德，令諸衆生，得清淨趣，得清淨生；功德滿足，一切世間，無能壞者。功德智慧，無有窮極；身、口、意業，具足莊嚴。常見諸佛，以不壞信，聽受正法；離諸疑網，憶持不忘。淨身、口業，心常安住，勝妙善根；永離貧乏，七財充滿。修學一切菩薩所學。得諸善根，成就平等；得妙解脫，一切種智；於諸衆生，得慈愛眼。身根清淨，言辭辯慧；發起諸善，心無染著。入甚深法，攝取一切；同住諸佛，住無所住。所有回向，悉如十方，菩薩摩訶薩，所發回向。廣大如法性，究竟如虛空。願我等得如所願，滿菩提願；四生六道，同得如願。重復增到，五體投地；歸依世間，大慈悲父。

南無彌勒佛
南無威德佛

南無釋迦牟尼佛
南無見明佛

南無善行報佛	南無善喜佛
南無無憂佛	南無寶明佛
南無威儀佛	南無樂福德佛
南無功德海佛	南無盡相佛
南無斷魔佛	南無盡魔佛
南無過衰道佛	南無不壞意佛
南無水王佛	南無淨魔佛
南無衆上王佛	南無愛明佛
南無福燈佛	南無菩提相佛
南無智音佛	
南無常精進菩薩	南無不休息菩薩
南無無邊身菩薩	南無觀世音菩薩

又復歸命，如是十方，盡虛空界，一切三寶。願以慈悲力，同加攝受！令回向心，具足成就。我等若具有無量大惡罪業，應受無量無邊楚毒，於惡道中，不能自拔；違今日發菩提心、違菩提行、違菩提願者；願十方大地菩薩，一切聖人！以慈悲心，不違本願；助我等於彼三惡道中，救諸衆生，令得解脫；誓不以苦故，捨離衆生。為我荷負重擔，滿平等願。度脫一切衆生，生老病死，愁憂苦惱，無量厄難；令諸衆生，悉得清淨；具足善根，究竟解脫。捨離衆魔，遠惡知識；親近善友，真善眷屬。成就淨業，盡滅衆苦；具足菩薩，無量行願。見佛歡喜，得一切智；還復度脫，一切衆生。

發願第三十九

今日道場，同業大眾！已發回向竟，次復應須，發如是願。尋夫衆惡所起，皆緣六根；是知六根，衆禍之本。雖為禍本，亦能招致無量福業；故勝鬘經言：守護六根，淨身、口、意。以此義證，生善之本；故於六根，發大誓願。

先發眼根願

願今日道場，同業大眾；廣及十方，四生六道，一切衆生；從今日去，乃至菩提；眼常不見，貪欲無厭，詐幻之色。不見諂諛曲媚，佞會之色。不見玄、黃、朱、紫，惑人之色。不見瞋恚鬪諍，醜狀之色。不見打撲，苦惱損他之色。不見屠裂，傷毀衆生之色。不見愚癡無信，疑闇之色。不見無謙無敬，憍慢之色。不見九十六種，邪見之色。

惟願一切衆生，從今日去，眼常得見，十方常住法身，湛然之色。常見三十二相，紫磨金色。常見八十種好，隨形之色。常見諸天諸仙，奉寶來獻，散華之色。常見口出五種色光，說法度人之色。常見分身散體，徧滿十方之色。常見諸佛，放肉髻光，感於有緣來會之色。常見十方菩薩，辟支羅漢，衆聖之色。常得與諸衆生，及諸眷屬，觀佛之色。常見衆善，無教假色。常見七覺淨華之色。常見解脫妙果之色。常見今日道場，大眾歡喜，讚法頂受之色。常見四衆，圍遶聽

法，渴仰之色。常見一切布施、持戒、忍辱、精進之色。常見一切靜默禪思，修習智慧之色。常見一切衆生，得無生忍，現前受記，歡喜之色。常見一切，登金剛慧，斷無明闇，補處之色。常見一切，沐浴法流，不退之色。已發眼根願竟。相與至心，五體投地；歸依世間，大慈悲父。

南無彌勒佛	南無釋迦牟尼佛
南無善滅佛	南無梵相佛
南無智喜佛	南無神相佛
南無如衆王佛	南無持地佛
南無愛日佛	南無羅睺月佛
南無華明佛	南無藥師上佛
南無持勢力佛	南無福德明佛
南無喜明佛	南無好音佛
南無法自在佛	南無梵音佛
南無妙音菩薩	南無大勢至菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以慈悲力，同加覆護！令我等得如所願，滿菩提願。

次發耳根願

又願今日道場，同業大衆；廣及十方，四生六道，一切衆生

；從今日去，乃至菩提；耳常不聞，啼哭愁苦，悲泣之聲。不聞無間地獄，受苦之聲。不聞鑊湯雷沸，震響之聲。不聞刀山劍樹，鋒刃割裂之聲。不聞十八地獄，間隔無量，苦楚之聲。不聞餓鬼，飢渴熱惱，求食不得之聲。不聞餓鬼，行動支節火然，作五百車聲。不聞畜生，身大五百由旬；為諸小蟲啖食，苦痛之聲。不聞抵債不還，生駱駝驢馬牛中；身常負重，鞭杖楚撻，困苦之聲。不聞愛別離、怨憎會等，八苦之聲。不聞四百四病，苦報之聲。不聞一切諸惡，不善之聲。不聞鐘鈴、螺鼓、琴瑟、箜篌、琳琅、玉佩，惑人之聲。

惟願一切衆生！從今日去，耳常得聞，諸佛說法，八種音聲。常聞無常、苦、空、無我之聲。常聞八萬四千，波羅蜜聲。常聞假名諸法，無性之聲。常聞諸佛一音說法，各得解悟之聲。常聞一切衆生，皆有佛性；法身常住，不滅之聲。常聞十地菩薩，忍辱修進之聲。常聞得無生解，善入佛慧，超出三界之聲。常聞諸法身菩薩，入法流水，真俗並觀，念念具足萬行之聲。常聞十方，辟支羅漢，四果之聲。常聞帝釋，為諸天說般若之聲。常聞十地補處大士，在兜率宮，說不退轉地，法行之聲。常聞萬善同歸，得佛之聲。常聞諸佛，讚歎一切衆生，能行十善，隨喜之聲。願諸衆生，常聞諸佛讚言：善哉！是人不久成佛之聲。已發耳根願竟。相與至心，五體投地；重復歸依世間，大慈悲父。

南無彌勒佛	南無釋迦牟尼佛
南無善業佛	南無意無謬佛
南無大施佛	南無明讚佛
南無衆相佛	南無德流布佛
南無世自在佛	南無德樹佛
南無斷疑佛	南無無量佛
南無善月佛	南無無邊辯相佛
南無寶月菩薩	南無月光菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以慈悲力，同加攝受！令我等得如所願，滿菩提願。

次發鼻根願

又願今日道場，同業大眾；廣及十方，四生六道，一切衆生；從今日去，乃至菩提；鼻常不聞，殺生滋味飲食之氣。不聞畋獵，放火燒害衆生之氣。不聞蒸煮熬炙衆生之氣。不聞三十六物，革囊臭處之氣。不聞錦綺羅縠，惑人之氣。不聞地獄，剝裂焦爛之氣。不聞餓鬼飢渴，飲食糞穢膿血之氣。不聞畜生，腥臊不淨之氣。不聞病臥牀席，無人看視，瘡壞難近之氣。不聞大小便利，臭穢之氣。不聞死屍降脹，蟲食爛壞之氣。

惟願大衆，六道衆生！從今日去，鼻常得聞，十方世界，牛頭栴檀，無價之香。常聞優曇鉢羅，五色華香。常聞歡喜園中，諸樹華香。常聞兜率天宮，說法時香。常聞妙法堂上，遊戲時香。常聞十方衆生，行五戒、十善、六念之香。常聞一切七方便人，十六行香。常聞十方辟支，學、無學人，衆德之香。常聞四果、四向，得無漏香。常聞無量菩薩：歡喜、離垢、發光、焰慧、難勝、現前、遠行、不動、善慧、法雲之香。常聞衆聖，戒、定、慧、解脫、解脫知見，五分法身之香。常聞諸佛菩提之香。常聞三十七品、十二緣觀、六度之香。常聞大悲三念、十力、四無所畏、十八不共法香。常聞八萬四千，諸波羅蜜香。常聞十方，無量妙極法身，常住之香。已發鼻根願竟。相與志心，五體投地；歸依世間，大慈悲父。

南無彌勒佛	南無釋迦牟尼佛
南無梨陀法佛	南無應供養佛
南無度憂佛	南無樂安佛
南無世意佛	南無愛身佛
南無妙足佛	南無優鉢羅佛
南無華纓佛	南無無邊辯光佛
南無信聖佛	南無德精進佛
南無妙德菩薩	南無金剛藏菩薩

南無無邊身菩薩 南無觀世音菩薩

又復歸依，如是十方，盡虛空界，一切三寶。願以慈悲力，同加攝受！令我等得如所願，滿菩提願。

次發舌根願

又願今日道場，同業大眾；廣及十方，四生六道，一切衆生；從今以去，乃至菩提；舌恆不嘗，傷殺一切衆生，身體之味。不嘗一切，自死之味。不嘗生類，血髓之味。不嘗怨家對主，毒藥之味。不嘗一切，能生貪愛煩惱滋味之味。

願舌恆嘗，甘露百種美味之味。恆嘗諸天，自然飲食之味。恆嘗香積香飯之味。恆嘗諸佛所食之味。恆嘗法身，戒定慧熏修所現食味。恆嘗法喜禪悅之味。恆嘗無量功德，滋治慧命，甜和之味。恆嘗解脫一味等味。恆嘗諸佛泥洹，至樂最上勝味之味。已發舌根願竟。相與志心，五體投地；歸依世間，大慈悲父。

南無彌勒佛	南無釋迦牟尼佛
南無真實佛	南無天主佛
南無樂高音佛	南無信淨佛
南無婆耆羅陀佛	南無福德意佛
南無焰熾佛	南無無邊德佛

南無聚成佛 南無師子遊佛
南無不動佛 南無信清淨佛
南無虛空藏菩薩 南無薩陀波崙菩薩
南無無邊身菩薩 南無觀世音菩薩

又復歸依，如是十方，盡虛空界，一切三寶。願以慈悲力，哀愍覆護！令我等得如所願，滿菩提願。

次發身根願

又願今日道場，同業大眾；廣及十方，四生六道，一切衆生；從今日去，乃至菩提；身常不覺，五欲邪媚之觸。不覺鑊湯、爐炭、寒冰等觸。不覺餓鬼，頭上火然，烱銅灌口，焦爛之觸。不覺畜生，剝裂苦楚之觸。不覺四百四病，諸苦惱觸。不覺大熱大寒，難耐之觸。不覺蚊蚋蚤蝨，諸蟲之觸。不覺刀杖毒藥，加害之觸。不覺飢渴困苦，一切諸觸。

願身常覺，諸天妙衣之觸。常覺自然甘露之觸。常覺清涼，不寒不熱之觸。常覺不飢不渴，無病無惱，休強之觸。常覺無有刀杖，苦楚之觸。常覺臥安覺安，無諸憂怖之觸。常覺十方，諸佛淨土，微風吹身之觸。常覺十方，諸佛淨土，七寶浴池，洗蕩身心之觸。常覺無老病死，諸苦之觸。常覺飛行自在，與諸菩薩聽法之觸。常覺諸佛涅槃，八自在觸。已發身根願竟。相與至心，五體投地；歸依世間，大慈悲父。

南無彌勒佛	南無釋迦牟尼佛
南無行明佛	南無龍音佛
南無持輪佛	南無財成佛
南無世愛佛	南無法名佛
南無無量寶明佛	南無雲相佛
南無慧道佛	南無妙香佛
南無虛空音佛	南無虛空佛
南無越三界菩薩	南無跋陀婆羅菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以慈悲力，覆護攝受！令我等得如所願，滿菩提願。

次發意根願

又願今日道場，同業大眾；廣及十方，四生六道，一切衆生；從今日去，乃至菩提；意常得知，貪欲、瞋恚、愚癡為患。常知身殺、盜、淫、妄言、綺語、兩舌、惡口為患。常知殺父、害母、殺阿羅漢、出佛身血、破和合衆、謗佛法僧、不信因果，是無間罪。常知人死更生，報應之法。常知遠惡知識，親近善友。常知諂受九十六種，邪師之法為非。常知三漏、五蓋、十纏之法是障。常知三塗可畏，生死酷劇，苦報之處。

願意常知，一切衆生，皆有佛性。常知諸佛，是大慈悲父，無上醫王；一切尊法，為諸衆生病之良藥；一切賢聖，為諸衆生看病之母。常知歸依三寶，應受五戒，次行十善；如是等法，能招天上、人中勝報。常知未免生死，應修七方便觀：煖、頂等法。常知應行，無漏、苦、忍，十六聖心；先修十六行觀，觀四真諦。常知四諦，平等無相，故成四果。常知總相、別相，一切種法。常知十二因緣，三世因果，輪轉無有休息。常知修行六度、八萬諸行。常知斷除，八萬四千塵勞。常知體會無生，必斷生死。常知十住階品，次第具足。常知以金剛心，斷無明闇，得無上果。常知體極一照，萬德圓備，累患都盡，成大涅槃。常知佛地十力、四無所畏、十八不共，無量功德、無量智慧、無量善法。已發意根願竟。相與至心，五體投地；歸依世間，大慈悲父。

南無彌勒佛	南無釋迦牟尼佛
南無天王佛	南無珠淨佛
南無善財佛	南無燈焰佛
南無寶音聲佛	南無人主王佛
南無羅睺守佛	南無安隱佛
南無師子意佛	南無寶名聞佛
南無得利佛	南無徧見佛
南無馬鳴菩薩	南無龍樹菩薩

南無無邊身菩薩 南無觀世音菩薩

又復歸依，如是十方，盡虛空界，一切三寶。願以慈悲心，哀愍覆護攝受！令我等得如所願，滿菩提願。

次發口願

又願今日道場，同業大眾；廣及十方，四生六道，一切衆生；從今日去，乃至菩提；口常不毀訾三寶。口不謗弘通法人，說其過惡。不言作善不得樂報，作惡不得苦果。不言人死斷滅，不復更生。不說無利益，損他人事。不說邪見外道，所造經書。不教人作十惡業。不教人造五逆罪。不稱揚人惡。不言俗間，無趣好戲笑事。不教人僻信，邪師鬼神。不評論人物好醜。不瞋罵父母、師長、善友。不勸人造罪。不斷人作福。

願口常讚歎三寶。讚歎弘通法人，說其功德。示人善惡果報。常說悟人身死，神明不滅。常發善言，使人利益。常說如來，十二部經。常言一切衆生，皆有佛性；當得常、樂、我、淨。常教人孝養父母，敬事師長。常勸人歸依三寶，受持五戒、十善、六念。常讚誦經典，說諸善事。常教人近善知識，遠惡知識。常說十住佛地，無量功德。常使人修淨土行，莊嚴極果。常教人勤禮三寶。常教人建立形像，修諸供養。常教人作諸善事，如救頭然。常教人救濟窮苦，無暫停息。

。已發口願竟。相與至心，五體投地；歸依世間，大慈悲父。
。

南無彌勒佛	南無釋迦牟尼佛
南無世華佛	南無高頂佛
南無無邊辯才成佛	南無差別知見佛
南無師子牙佛	南無梨陀步佛
南無福德佛	南無法燈蓋佛
南無目犍連佛	南無無憂國佛
南無意思佛	南無樂菩提佛
南無師子遊戲菩薩	南無師子奮迅菩薩
南無無邊身菩薩	南無觀世音菩薩

又復歸依，如是十方，盡虛空界，一切三寶。願以慈悲力，覆護攝受！令我等得如所願，滿菩提願。

諸行法門

又願十方，盡虛空界，四生六道，一切衆生；從今發願之後，各能具足，諸行法門：篤信三寶，恭敬法門。不懷疑惑，堅固法門。欲斷起惡，勤懺法門。欲願清淨，念悔法門。不毀三業，護身法門。永淨四事，護口法門。息心清淨，護意法門。具足所願，菩提法門。一切不害，悲心法門。化使立德，慈心法門。不毀他人，歡喜法門。不欺他人，至誠法門。

。欲滅三塗，三寶法門。終不虛妄，真實法門。不慢彼我，捨害法門。無有猶豫，棄結法門。斷鬪訟意，無諍法門。奉行平等，應正法門。

又願衆生，具足如是，無量法門：心趣法門，觀心如幻。意斷法門，捨不善本。神足法門，身心輕便。信根法門，不願退輪。進根法門，不捨善軌。念根法門，善造道業。定根法門，攝心正道。慧根法門，觀無常空。信力法門，越魔威勢。進力法門，一去不還。念力法門，未曾忘捨。定力法門，滅衆妄想。慧力法門，周旋往來。進覺法門，積行佛道。正定法門，逮得三昧。淨性法門，不樂餘乘。願諸衆生，悉具菩薩摩訶薩，如是等八萬法門；清淨佛土，勸化慳嫉。悉度衆惡，八難之處；攝諸諍訟，瞋恚之人。勤行衆善，攝懈怠者；定意神通，攝諸亂想。已發願竟。相與至心，五體投地；歸依世間，大慈悲父。

南無彌勒佛	南無釋迦牟尼佛
南無法天敬佛	南無斷勢力佛
南無極勢力佛	南無慧華佛
南無堅音佛	南無安樂佛
南無妙義佛	南無愛淨佛
南無慚愧顏佛	南無妙髻佛
南無欲樂佛	南無樓至佛

南無藥王菩薩 南無藥上菩薩
南無無邊身菩薩 南無觀世音菩薩

又復歸依，如是十方，盡虛空界，一切三寶。願以慈悲力，救護攝受！令三界六道，四生衆生，以今慈悲道場懺法，發心、發願，功德因緣；各各具足，功德智慧；以神通力，隨心自在。

囑累第四十

今日道場，同業大眾！相與已為，六道四生衆生，發誓願竟。次以衆生，咐囑諸大菩薩；願以慈悲心，同加攝受！以今懺悔、發願，功德因緣；又願以慈悲念力，令一切衆生，悉皆樂求無上福田；深信施佛，有無量報。令一切衆生，一心向佛；具得無量，清淨果報。願一切衆生，於諸佛所，無慳慳心；具足大施，無所愛惜。又願一切衆生，於諸佛所，修無上福田，離二乘願，行菩薩道，得諸如來，無礙解脫，一切種智。又願一切衆生，於諸佛所，種無盡善根；得佛無量，功德智慧。又願一切衆生，攝取深慧；具足清淨，無上智王。又願一切衆生，所遊自在；得諸如來，至一切處，無礙神力。又願一切衆生，攝取大乘；得無量種智，安住不動。又願一切衆生，具足成就，第一福田；皆能出生，一切智地。又願一切衆生，於一切佛，無嫌恨心；種諸善根，樂求佛智。又願一切衆生，以妙方便，往詣一切，莊嚴佛刹；於一

念中，深入法界，而無疲倦。又願一切衆生，得無比身；盡能徧遊十方世界，而無疲厭。又願一切衆生，成廣大身，得隨意行；得一切佛，神力莊嚴，究竟彼岸；於一念中，顯現如來，自在神力，徧虛空界。已發如是大願竟。廣大如法性，究竟如虛空。願一切衆生，得如所願，滿菩提願。相與至心，五體投地。倘我等若受苦報，不能救衆生者；以諸衆生囑累

無量無邊 盡虛空界 無生法身菩薩

無量無邊 盡虛空界 無漏色身菩薩

無量無邊 盡虛空界 發心菩薩

興正法 馬鳴大師菩薩

興像法 龍樹大師菩薩

十方盡虛空界 無邊身菩薩

十方盡虛空界 觀世音菩薩

文殊師利菩薩 普賢菩薩

師子遊戲菩薩 師子奮迅菩薩

師子幡菩薩 師子作菩薩

堅勇精進菩薩 金剛慧菩薩

棄陰蓋菩薩 寂根菩薩

慧上菩薩 常不離世菩薩

藥王菩薩 藥上菩薩

虛空藏菩薩 金剛藏菩薩

常精進菩薩 不休息菩薩

妙音菩薩 妙德菩薩
寶月菩薩 月光菩薩
薩陀波崙菩薩 越三界菩薩

又復囑累，如是十方，盡虛空界，一切菩薩！願諸菩薩摩訶薩，以本願力、誓度衆生力；攝受十方，無窮無盡，一切衆生。願諸菩薩摩訶薩，不捨一切衆生；同善知識，無分別想。願一切衆生，知菩薩恩，親近供養。願諸菩薩，慈愍攝受；令諸衆生，得正直心；隨逐菩薩，不相遠離。願一切衆生，隨菩薩教，不生違反；得堅固心，不捨善知識；離一切垢，心不可壞。令一切衆生，為善知識，不惜身命，悉捨一切，不違其教。令一切衆生，修習大慈，遠離諸惡；聞佛正法，悉能受持。令諸衆生，同諸菩薩，善根業報；菩薩行願，究竟清淨。具足神通，隨意自在；乘於大乘，乃至究竟，一切種智。於其中間，無有懈怠。乘智慧乘，至安隱處；得無礙乘，究竟自在。始從歸依三寶、斷疑生信、懺悔、發心、顯果報、出地獄、解怨、自慶、發願、回向，終至囑累，所有功德；悉以布施，十方盡虛空界，一切衆生。仰願彌勒世尊，現為我證！十方諸佛，哀愍覆護！所悔所願，皆得成就。願諸衆生，同慈悲父，俱生此國；預在初會，聞法悟道。功德智慧，一切具足；與諸菩薩，等無有異。入金剛心，成等正覺。

讚佛祝願

多陀阿伽度、阿羅訶、三藐三佛陀，十號具足；度人無量，拔生死苦。以今懺悔、禮佛，功德因緣；願諸衆生，各各具足；得如所願，滿菩提願。我等今日，所發誓願；悉同十方，盡虛空界，一切諸佛，諸大菩薩，所有誓願。諸佛菩薩，所有誓願，不可窮盡；我今誓願，亦復如是。廣大如法性，究竟如虛空；窮未來際，盡一切劫。衆生不可盡，我願不可盡；世界不可盡，我願不可盡；虛空不可盡，我願不可盡；法性不可盡，我願不可盡；涅槃不可盡，我願不可盡；佛出世不可盡，我願不可盡；諸佛智慧不可盡，我願不可盡；心緣不可盡，我願不可盡；起智不可盡，我願不可盡；世間道種、法道種、智慧道種不可盡，我願不可盡。若十種可盡，我願乃可盡。一切和南，三乘聖衆。

慈悲道場懺法卷第十

七佛滅罪真言

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶（七遍）

補闕真言

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶（三遍）

讚

捍勞懺禮 冀佛垂慈 六根滿願在斯時
諸行悉堅持 回向菩提 囑累度人師
南無法雲地菩薩摩訶薩 (三唱)

出懺

十身相好，巍巍不動紫金山；十號能仁，蕩蕩常圓碧玉相。神機普應，妙化無方。願舒無礙之圓光，證此後時之佛事。頂禮十方之覺號，懺除十惡之罪愆。上來奉為，求懺我等，修崇慈悲道場懺法。茲當第十卷，善果周隆。於其壇內，然燈發焰，散華莊嚴；烹茗獻果，設供運心。敷揚種種之功勳，敬禮塵塵之佛事。發殷重心，秉誠回向：十方諸大覺，三藏貫華文，五眼辟支佛，六通阿羅漢；天真并地聖，水哲與陽賢；四府該羅，無邊靈貺。鑑茲凡悃，證明善因。奉為求懺我等，洗空微細罪愆，成就無邊福利。伏願：頓除十使，迴脫十纏。圓發十心，十願滿而真空月朗；修行十地，十障斷而覺苑華開。塵塵開解脫之門，處處顯真如之用。怨親普利，凡聖同資；俱承懺悔之善緣，共證真常之妙道。雖則微文懺悔，誠恐細惑未除；再勞尊衆，同求懺悔。

讚

梁皇懺 十卷功德力 願滅信人十纏罪
親證菩薩法雲地 懺文舉處罪華飛
解了怨 懺了罪 消災增福慧
蓮池海會願相逢 彌陀佛前親受記
南無蓮池會菩薩摩訶薩 (三唱)

舉讚

梁皇懺 十卷已全周 回向四恩并三有
拜懺我等增福壽 惟願亡靈往西遊
法雲地菩薩 惟願哀納受
南無登雲路菩薩摩訶薩 (三唱)